

## Scoileanna Úra

### Ceist 1

Beidh tú ag féachaint ar ball ar thuairisc faoi chlár nua tógála do scoileanna a bheidh ar siúl as seo go ceann cúig bliana. Sula bhféachann tú ar an tuairisc déan iarracht na ceisteanna seo a leanas a fhreagairt.

- An bhfuil gá le scoil nua i do cheantar féin?
- Cad iad na buntáistí a bheadh ann do gheilleagar na tíre, dá dtógfaí go leor scoileanna nua in Éirinn?
- An bhfuil daonra na hÉireann ag fás dar leat?
- Cad atá ar eolas agat maidir le daonra an domhain?

### Ceist 2

Anois gan féachaint go fóill, déan iarracht leagan Gaeilge a chur ar na téarmaí Béarla thíos. Cuir do chuid freagraí i gcomparáid le freagraí an duine in aice leat.

Refurbishment	_____
Surge	_____
Building Sector	_____
Prefabricated	_____
Need	_____
Births	_____
Programme	_____
Education System	_____
Pressure	_____
Building	_____
Hut	_____
Created	_____
Situated	_____
Site	_____

### Ceist 3

Anois féach ar an mír agus déan iarracht na ceisteanna thíos a fhreagairt.

1. Cé mhéad post a chruthófar san earnáil tógála?
2. Cá ndeachaigh Áine Ní Bhreisleáin ar cuairt?
3. Cén fáth a bhfuil gá leis an bplean tógála, dar leis an rialtas?
4. Ainmnigh áis nua amháin a bheidh i gColáiste Ailigh.
5. Cé mhéad scoil úr atá le tógáil?

**Ceist 4** Is iomaí sampla den saorbhriathar atá le cloisteáil sa mhír nuachta, mar shampla, ‘Táthar’, ‘cruthófar’ srl.

Déan iarracht an sliocht thíos a athscríobh san aimsir chaite.

**Déanfar** athchóiriú agus **cuirfear** seomraí breise le go leor scoileanna<sup>1</sup> eile, rud a **chruthóidh** ochtó míle áit scoile do pháistí. **Deir** an rialtas go **bhfuil** súil acu go mbeidh breis agus cúig mhíle dhéag post san earnáil tógála cruthaithe mar gheall ar an chlár tógála seo.

**Ceist 5** Cloistear go leor uimhreacha sa mhír. Cad atá ráite faoi na huimhreacha seo a leanas?

Uimhir	Míniú
15,000	
165	
80,000	
106	
43	
2017	

**Ceist 6** Déan an ráiteas thíos a phlé. Is féidir é a úsáid mar rún díospóireachta.

‘Ba cheart do rialtas na tíre seo srian a chur le líon na bpáistí a cheadaítear i ngach teaghlach’

---

<sup>1</sup>‘Scoilteacha’ a deirtear i gcanúint an tuairisceora.

## Treoracha agus freagraí

- Ceist 1** Is féidir gach beirt a chur ag plé na gceisteanna seo sula seinntear an tuairisc nó iad a chur ag obair i ngrúpaí de thriúr nó de cheathrar.
- Ceist 2**
- |                  |                         |
|------------------|-------------------------|
| Refurbishment    | <u>Athchóiriú</u>       |
| Surge            | <u>Borradh</u>          |
| Building Sector  | <u>Earnáil tógála</u>   |
| Prefabricated    | <u>Réamhdhéanta</u>     |
| Need             | <u>Gá</u>               |
| Births           | <u>Breitheanna</u>      |
| Programme        | <u>Clár</u>             |
| Education System | <u>Córas Oideachais</u> |
| Pressure         | <u>Brú</u>              |
| Building         | <u>Foirgneamh</u>       |
| Hut              | <u>Bothán</u>           |
| Created          | <u>Cruthaithe</u>       |
| Situated         | <u>Lonnaithe</u>        |
| Site             | <u>Suíomh</u>           |
- Ceist 3**
1. Cruthófar thart ar chúig mhíle dhéag post san earnáil tógála.
  2. Chuaigh Áine Ní Bhreisleáin ar cuairt go dtí dhá scoil i dTír Chonaill.
  3. Tá gá leis an bplean tógála toisc go bhfuil borradh mór tagtha ar líon na mbreitheanna sa tír seo le blianta beaga anuas. Cuireann sé seo brú ar an gcóras oideachais.
  4. Tógfar halla spóirt, páirceanna spóirt agus seomraí do na hábhair phraiticiúla.
  5. Tógfar 106 bunscoil agus 43 meánscoil idir seo agus 2017.
- Ceist 4** **Rinneadh** athchóiriú agus **cuireadh** seomraí breise le go leor scoileanna<sup>1</sup> eile, rud a **chruthaigh** ochtó míle áit scoile do pháistí. **Dúirt** an rialtas go **raibh** súil acu go mbeadh breis agus cúig mhíle dhéag post san earnáil tógála cruthaithe mar gheall ar an chlár tógála seo.

---

<sup>1</sup>'Scoilteacha' a deirtear i gcanúint an tuairisceora.

**Ceist 5**

<b>Uimhir</b>	<b>Míniú</b>
15,000	Líon na bpost a chruthófar san earnáil tógála
165	Líon na ndaltaí i Leitir Ceanainn atá i seomraí réamhdhéanta le sé bliana anuas
80,000	Seo líon na n-áiteanna nua scoile do pháistí
106	Líon na bhfoirgneamh úr bunscoile a thógfáir
43	Líon na bhfoirgneamh úr meánscoile a thógfáir
2017	Spriocbhliain tógála an chláir

**Ceist 6** Is féidir an ráiteas a phlé nó é a úsáid mar rún díospóireachta.

### **Maolra Mac Donnchadha**

Tá clár nua tógála scoile fógartha<sup>1</sup> ag an rialtas a chruthóidh 80,000 áit scoile do dhaltaí as seo go ceann cúig bliana. Táthar le hathchóiriú a dhéanamh ar scoileanna freisin. Cuirfidh siad borradh creidtear, faoin earnáil tógála agus cruthófar thart ar chúig mhíle dhéag post dá bharr. Chuaigh Áine Ní Bhreisleáin chuig dhá scoil i dTír Chonaill a fuair an dea-scéala inniu.

### **Áine Ní Bhreisleáin**

Seo scoil *'Educate Together'* i Leitir Ceanainn. Tá céad seasca is a cúig dalta ag fáil oideachais sna seomraí réamhdhéanta le sé bliana. Inniu fuair siad an dea-scéala go raibh scoil úr le fáil acu. Deir an rialtas go bhfuil gá leis an phlean tógála mar go bhfuil borradh mór tagtha ar líon na mbreitheanna sa tír le blianta beaga anuas, rud a chuireann brú ar an chóras oideachais.

### **Múinteoir**

Tá tuismitheoirí, múinteoirí, daltaí uilig breá sásta. Seo difear mór<sup>2</sup> dúinne, beidh foirgneamh againn, foirgneamh buan, ní bheidh na botháin ann, beidh clós i bhfad níos mó againn do na páistí le bheith ag súgradh ann.

### **Áine Ní Bhreisleáin**

Cuirfear tús le tógáil i mbliana ar fhoirgneamh úr de Choláiste Ailigh i Leitir Ceanainn. Deir an príomhoide go bhfuil an scoil ag méadú agus go bhfuil spás de dhíth orthu.

### **Príomhoide na Scoile**

Ciallaíonn sé go mbeidh spás againn fá choinne na n-ábhar praiticiúil<sup>3</sup>, ó thaobh spóirt de fosta beidh seomra spóirt, beidh halla spóirt, beidh páirceanna spóirt againn, beidh spás atá tuillte ag na daltaí againn sa scoil úr.

### **Áine Ní Bhreisleáin**

Déanfar athchóiriú agus cuirfear seomraí breise le go leor scoileanna<sup>4</sup> eile, rud a chruthóidh ochtó míle áit scoile do pháistí. Deir an rialtas go bhfuil súil acu go mbeidh breis agus cúig mhíle dhéag post san earnáil tógála cruthaithe mar gheall ar an chlár tógála seo.

Tógfar céad agus a sé foirgneamh úr bun scoile agus ceathracha is a trí foirgneamh úr meánscoile idir seo agus 2017. Sa<sup>5</sup> pháirc seo i gcathair na muice i Leitir Ceanainn a bheidh ceann acu sin lonnaithe. Seo é an suíomh úr do Choláiste Ailigh agus táthar ag súil go gcuirfear tús leis an obair thógála ar an bhfoirgneamh sin i mbliana.

Áine Ní Bhreisleáin, Nuacht TG4 i Leitir Ceanainn

---

<sup>1</sup> *'Fógraithe'* a deirtear

<sup>2</sup> *'mhór'* a deirtear

<sup>3</sup> *'fá choinne na hábhair praiticiúil'* a deirtear.

<sup>4</sup> *'Scoilteacha'* a deirtear i gcanúint an tuairisceora

<sup>5</sup> *'Is ins an'* a deirtear